

Rakyat nilai sendiri sikap tamak DAP
Utusan Online
11 Julai, 2012

KUALA LUMPUR 10 Julai - Sikap tamak dan taksub pembangkang akan dinilai sendiri oleh rakyat Malaysia terutama apabila DAP dikatakan mahu bertanding sehingga 90 kerusi pada Pilihan Raya Umum Ke-13 (PRU-13).

Naib Presiden UMNO, Datuk Seri Hishammuddin Tun Hussein berkata, hasrat DAP yang mahu menampakkan ia sebagai parti dominan dalam pembangkang pasti sukar diterima sekutunya iaitu Pas dan Parti Keadilan Rakyat (PKR).

"Saya mahu tengok bagaimana mereka (DAP) boleh dapat persetujuan Pas dan PKR dalam soal ini," katanya ketika dihubungi Utusan Malaysia di sini hari ini.

Beliau mengulas pembahagian kuota kerusi pembangkang yang menetapkan Pas dan PKR masing-masing bertanding hanya di 66 kerusi sedangkan DAP dikatakan mahu bertanding sehingga 90 kerusi pada PRU-13.

Hasrat DAP itu dilihat bakal menjadikan parti tersebut sebagai parti dominan dalam pakatan pembangkang.

Hishammuddin berkata, sikap pembangkang terutama DAP itu amat berbeza dengan Barisan Nasional (BN) yang sentiasa mementingkan semangat setiakawan dan adil sesama sendiri.

"Inilah beza mereka (pembangkang) dengan kita (BN) yang telah menjalin hubungan konsisten dan seadil mungkin dalam parti," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/info.asp?y=2012&dt=0711&pub=Utusan_Malaysia&sec=Politik&pg=po_02.htm